

DIRECT TV NA LUGAR DI CABLE TV

Tempo cu a cuminza cu **CABLE TV** na Aruba tur hende tabata loco pa conexon wordo haci den nan bario pa nan por a abona.

Pero esnan cu a abona a bin ripara den corto tempo cu nan ta pagando pa **Tele Aruba**, canalnan di **Venezuela** y "**doble**" di **Tele Aruba**, canalnan cu for di añanan 50 y 60 nan ta captando **por nada**.

Nan a tene publico contento cu **HBO** y despues a kita esaki pasobra e tabata ser capta sin cu ta trata di canal cu ta autoriza pa transmiti pafor di Merca. Na su lugar a bin un **HBO-Ole** cu ta ni 10 % di **HBO** americano.

MOR TV cu su cambio a bira canal cu por wel di tira un banda.

Un tempo a "**scramble**" canal 9 y na su lugar a bini **Travel Channel** cu tabata hopi gusta y diripiente esaki a wordo kita tambe mescos cu canalnan di **Miami** cu e publico tabata gusta y cu a wordo kita di pantalla.

A bini canalnan acerca cu a resulta di ta canalnan barata y e pueblo a cuminza bira conciente cu **Cable TV** cu nan ta ricibi na Aruba ta **NADA** compara cu e centenares di canalnan cu tin.

A bini un man yen di canal nobo acerca sin cu mester a paga adicional, pero esakinan tampoco ta cos di gaba y locual e pueblo lo a desea.

Ultimo simannan a cuminza promove algun canal nobo y "**si bo kier nan bo tin cu paga adicional**," pero te awe ningun hende sa kico e canalnan ey ta come ni bebe.

Kehonan a cuminza yobe manera tormento, y aña a habri sin cu abonadonan sa riba kico nan lo abona ariba pagando mas.

MONOPOLIO DI CABLE

E monopolio di e compania aki ta manera monopolio cu tin riba varios otro cos na Aruba, caminda bo mester acepta loke nan ta duna pasobra no tin otro pa bo haci cambio.

Ayera por ehemplo muchanan a keda sin nan canal di muñequitos y diripiente ora cu nan a haya esaki, a bin resulta cu a yena e canal aki cu muñequitos na Spaño. Kizas nan a lubida di reset esaki?

Kico ta e motibo cu a cambia esaki no ta conoci.

Pero no ta aceptable ningun excusa cu lo indica: "**ta pasobra tin un comunidad di habla spaño grandi na Aruba**".

E kehonan sinembargo tabata masha hopi ayera debi na disgusto cu abonadonan a pasa aden **ATROBE**.

Ningun pais latino lo no cambia nan programacionnan pa otro idioma

pasobra tin comunidatnan di e idioma nan ey bibando riba e pais.

Ingles naturalmente no ta nos idioma, pero e ta e idioma cu semper nos a custumbra cune pa loke ta pelicula den teatronan y programanan di television.

Ta novela so ta pasa na Spaño pasobra nan ta bin di paisnan di habla spaño.

No tin ningun instancia tampoco unda e pueblo por reclama pasobra manera mucha chiquito e pueblo ta ser trata cu "**mester acepta loke tin ariba mesa y si bo no ta gusta bo laga**".

KICO ANTO DI DIRECT TV ?

Awor cu hopi hende ta pendiente di **Direct TV** cu cantidad mas grandi di canal disponibel via e dish chiquito, ta e deseo pa esnan involvi cu esaki, busca manera pa duna ofertanan mas favorable na comunidad cu posibilidad di pago mas favorable, y ademas un variacion di mas tanto canalnan mas atractivo.

E ora ey si lo mira cuanto hende ta **STOP DI ABONA** riba **CABLE TV** y ricibi canalnan mucho mas na nan gusto cu **DIRECT TV**.

E pueblo lo prefera di paga un suma chiquito mensualmente pa varios aña, pa e dish bira di nan, pero lo disfruta di locual nan mes a cumpra y no depende riba un compania americano cu ta duna nan kico cu ta contra nan gusto.

E pueblo sa masha bon kico ta e canalnan cu nan ta desea awor y no ta habri mas pa wordo tuma haci sokete.

CANALNAN RIBA LISTA DI DESEO

E pueblo lo kier mira **Fox Americano**, **Cinemax americano**, **showtime americano**, **The Game Show network**, **Disney Channel**, **VH-1**, **MTV** entre otro cu ta canalnan pa cada gusto riba diferente aspecto di television.

Si a pone e canalnan di **Venezuela** y di **Aruba** (pa pueblo paga) por a pone tambe por ehemplo **Tele Curacao** y **Flamingo**.

E deseo pa 1997: **Direct TV** y cu su sonido stereo pa despues haci e cambio y "**ricibi balor pa bo placa**" sin cu tin cu depende riba **MONOPOLIO** cu e pueblo lo sinti mañan ora cu **corrosion** cuminza come e cablenan cu tin bao di tera rond di nos isla y cu **Tele Aruba** bay keda cu e dolor financiero cu e americanonan ta bay laga atras pa nan dia traspasa e compania.

Juby

ISA HOLIDAY GALA A RESULTA EXITOSO DANKI NA E SOSTEN DI MAYORNAN

ORANJESTAD [AAN] E International School di Aruba cu su Gala Dinner y Baile pa recauda fondo cu a ser teni dia 14 di december ultimo, tabata posibel pa recauda suficiente fondo pa compra computernan pa e school y pa yena e lista deseá pa mayoria di e educadoman.

IPA cu a sponser e fund raiser, ta yama danki na tur e mayornan y studiantenan cu a sostene e evento cu nan ticket. Un danki especial na esnan cu a patroniza di Afs. 1000 = o mas cu a yuda pa e cambianan positivo di e school.

ABN Amro Bank, Associated Architects Aruba, Casa Haime, Dakota Laundry, Coastal Aruba Refinery Co. Coastal Petroleum N.V., First National Bank, Gandelman Jewelers, General Air Services, Hyatt Hotel, KPMG Information Systems, Radisson Hotel, Mr. & Mrs. Maguruza y Femy Muyale. Un danki grandi na e sponsoman Boris Free Zone, Greenhill Groceries, Land Scarr Co., Karel O. Wever y Evelma Wever-Geerman y Jerry McGee,

Ed.D. Headmaster di ISA, y un danki grandi na tur e comerciantenan cu tabata asina generoso cu certificadonan pa e doorpizes, incluyendo Air Aruba, Kenro Jewelers, y Beach Bum cu a percura pa e premionan grandi.

IPA ta yama danki na tur e trahadoman, esta e mayornan cu a pone nan tempo disponibel pa e evento exitoso aki. nan tempo y talento tur dia lo ser aprecia door di e studiantenan, cu por beneficiá for di e tecnologia di awendia.

ROBO DEN SCHAEPMANSTRAAT

ORANJESTAD (AAN): Riba prome dia di aña, como nuebe caso di ladronicia wordo entrega.

Den Dr. Schaepmanstraat tres cadena di oro, armband, renchi oreo, dos holoshi, y radio cassette player ladron a pasa man pa nan.

For di un cas na Noord, 400 Dollar Jamaquino, 200 Dollar Mericano, dos boter di biña y un pressure cooker a cria pia.

For di un camber den un Highrise Hotel a worde horta tambe. Pero Recherche lo

ricibi un lista despues di loke a ser horta.

Na Paraguaystraat un renchi dede di oro blanco, armband y un renchi dede oro di hende homber a cria pia.

Na Santa Lucia tres caha galiña, dos ham, boter di champaña y diferente cos di come a desaparece.

Na Gemani Jewelers vitrina a worde kibra. A desaparece dos armband y dos cadena oro.

For di un cas den Caya Betico Croes a desaparece un radio cassette stereo.

TRES MOUNTAIN BIKE HORTA DEN DIA CLA DILANTI DI ABN BANK

ORANJESTAD (AAN) -- Ayera durante dia, tres bicicleta Mountain Bike, a ser horta dilanti di ABN Bank den caya grandi na Playa.

Tres Mountain Bike tabata mara cu cadena y poni dilanti di ABN y ladronnan cu a baha na awa cu e bicicletanan aki lo mester a haci uzo di un pick up o van pa asina carga nan bay cu nan.

E ladroncia lo mester a tuma lugar entre 10'or y mey mainta y tres or di atardi.

Esnan cu durante dia haya cualkier persona ta ofrece nan un Mountain Bike pa compra, mester tene cuenta cu por trata aki di bicicletanan horta

y sigur si nan ta di e marca Trek color, blauw, cora y berde cu number di registracion: 1487901. 1484429.

Cualquier persona cu por sa algo di e bicicletanan aki por tuma contacto cu Martin de Kok na tel. 20409 o cu Aldrick Maduro na tel. 31582.

Pa esnan cu por duna e tip valioso tin un bonus disponible.

Tur hende cu tin un Mountain Bike ta worde conseha pa saca foto di su bicicleta, pa asina den caso cu ladronnan baha na awa cu esaki, Polis tin un bon pista riba kico nan mester busca.



Telefon
26747

Fax
28551